

## Zoonder

*Johan Kwast*

'k Deank der nog wal ees an wierum en noe wil ik d'r 'n verhaal van maken.

'n Officier van piket heul mij an. Of ik vanmirrag op 't bureelgebouw kan kommen. Ik der hen, meld mij en kan der voort bij goan zitten. "Wat wilt ze toch van mij?" Dan heur ik dat ik oet'ezoch bin um vuur de veeldartillerie oet Assen met te doon an de Ned. Mil. Baanatletiek kampioenschappen. "Miej wal good", mooi nen dag van de ketten of. Zee schriewt mij in vuur de vier kilometer.

Nen zet later berich: "Eers voldoon an de kwalificatie eis". "Vanmirrag um twee uur melden op de atletiekbaan." "t Is mij wat!"

't Is snikheet en de zun brandt der op. En ik möt alleen oawer de baan, lopen tegen de tied.

Ne helfte geet 't good, mear dan slöt de wearnte too. 't Tempo zakt en oeteandelijk kom ik veer sekonden te kot. "Ofewezen, 't feest geet nich duur."

'n Dag of wat der noa: "Gezien de extreem ongunstige omstandigheden bent alsnog geplaatst."

"Dat har ik ok èdach!"

Dan en dan wörd ik in Leiden verwacht.

Ne mooie seentelbaan, rondum in t hooft.

Hoo laat 't spul begeent en hoo laat ik an de buurt bin is nich bekeand.

A'k der bietieds bin zal 't zich wal redden.

Zo geet dat in dee dage.

Dagens vuur 'n groten dag kaan'k 'n vriejvervoertje ophalen en wieders is 't: "Red oe der met."

Vroog loat ik mij wakker maken duur de wacht. De klere anscheten en dan op de centrale kökken an.

Wat etten halen vuur noe en brood um met te nemmen.

Half zes, nog gin meanske te zeen.

Um zes uur keump der een an met 'n slöttel.

Van brood metnemmen is niks bekeand en de oale stoet is op.

'n Niejen anvoer keump pas oawer 'n uur.

Um dee tied mut ik al in 'n trein zitten.

"Dan mear zoonder etten op pad".

Steil vroeg waandel ik al noar "de Leidse Hout".

Ze bint nog gangs allens kloar te maken.

't Tiedschema wördt opèhangen.

"Balen!"; Pas um veer uur is de 5000 meter.

Dat wördt 'n helen dag roondhangen met nen leugen boek, water oet 'n kranen en met 6 ceant in de knip kaan'k ok niks.

't Is dudelijk: "Sukses is is der vandaag nich bij".

't Wödt twaalf en 'n half zwoare roonden.

Noa tien moal roond ma'jt alleen de eerste viefteen verdan.

Oetèteld kom ik as nummer veerteen oawer 'n streep.

De tied lik der nich op.

Slap as ne vaatdook spoor ik tegen 'n oawend wierum op Assen an.

Um iets vuur tien goa'k duur de wacht.

Van de kantine dreait ze net 'n slöttel um; "te laat!" Dat wödt wier wochen tot 'n aanderen dag.

Dan keump 'n niejen vuurraad etten.

'k Val zowat van 'n groat; 'k weet

der good van.

In 'n mirrag, in de kantine, sprek ik dee laste 6 ceant an.

Net genog vuur twee "sprits"



### String

Grootmoo's onderboks. buitengewoon  
Poetsen ik heel mien brommert met schoon  
Mar met nen nie'jmoodsen string  
Zo'n door achterlijk ding  
Köj alleen nog 't ventieltje met doon.

Wossen Gait (Gerrit Rensink)